

四庫全書

集部

欽定四庫全書

文章辨體彙選卷一百二十九

明 賀復徵 編

表五

道州到任謝上表

唐元結

臣某言去年九月勅授道州刺史屬西戎侵軼至十二月臣始於鄂州授勅牒即日赴任臣州先被西原賊屠陷節度使已差官攝刺史兼又聞奏臣在道路待恩命

者三月臣以五月二十二日到州上訖耆老見臣俯伏而泣官吏見臣以無菜色城池井邑但生荒草登高極望不見人煙嶺南數州與臣接近餘寇蟻聚尚未歸降臣見招輯流亡率勸貧弱保守城邑畝種山林冀望秋後少可全活臣愚以爲今日刺史若無武畧以制暴亂若無文才以救疲弊若不清廉以身率下若不變通以救時須一州之人不叛則亂將作矣豈止一州者乎臣料今日州縣堪征稅者無幾已破敗者實多百姓戀墳

墓者蓋少思流亡者乃衆則刺史宜精選謹擇以委任之固不可拘限官次得之貨賄出之權門者也凡授刺史特望陛下一年問其流亡歸復幾何田疇墾闢幾何二年問畜養比初年幾倍供稅比初年幾倍三年計其功過必行賞罰則人皆不敢冀望僥倖苟有所求臣實孱弱辱陛下符節陛下必當謹擇臣固宜廢歸山野供給井稅臣不任懇款之至謹遣某官奉表陳謝以聞

道州再謝上表

元結

臣某言臣伏奉某月日勅再授臣道州刺史以某月日到州上訖臣前日在官雖百姓不至流亡而歸復者十無一二雖寇盜不犯邊鄙而不能兵救鄰州雖賦歛僅能供給而有司不無罪狀雖人吏似從教令而風俗未能移易臣又多病不無假故水旱疾沴每歲不免疾疫死傷臣州尤甚以臣自訟合抵刑憲聖朝寬貸猶宜奪官陛下過聽重有授任伏恐守廉讓者以臣爲苟安祿位抱公直者以臣爲內懷私僻有材識者辱臣於臺隸

之下用刑法者罪臣於程式之中臣所以不敢即日辭  
免待陛下按驗虛實然後歸罪有司今四方兵革未寧  
賦歛未息百姓流亡轉甚官吏侵剋日多實不合使  
庸貪猥之徒凡弱下愚之類以貨賂權勢而爲州縣長  
官伏望陛下特加察問舉其功過必行賞罰以安蒼生  
誰不自私臣實不敢所言狂直朝夕待罪不任懇款之  
至謹遣某官奉表陳謝

謝容州表

元結

臣結言臣伏奉今月二十二日勅授臣使持節都督容  
州諸軍事守容州刺史中丞充本管經畧守捉使四月  
十六日勅到二十一日發付本道行營臣實愚弱謬當  
寄任奉詔之日不獲憂惶臣聞孝於家者忠於國忠以事  
君者無所隱臣有至切不敢不言臣實一身奉養老母  
醫藥飲食非臣不喜臣暫違離則憂悸成疾臣又多疾  
近日加劇前在道州黽勉六歲實無政理多是假名頻  
請停官使司不許今臣所屬之州陷賊歲久頽城古木

遠在炎荒管內諸州多未賓服行營野次向十餘年在臣一身爲國展効死當不避敢憚艱危但以老母念臣疾疹日久時方大暑南逾火山舉家漂泊寄在湖上單車將命赴於賊庭臣將就路老母悲泣聞者悽愴臣心可知臣欲扶持版輿南之合浦則老母氣力難於遠行臣欲奮不顧家則母子之情禽畜猶有臣欲久辭老母則又污辱名教臣欲便不之官又恐稽違詔命在臣肝腸如煎如燭昔徐庶心亂先主不逼令伯陳情晉武允



許君臣國家萬代爲規伏惟陛下以孝理萬姓慈育生  
民在臣情志實堪矜愍臣每讀前史見吳起遊宦噬臂  
不歸溫嶠奉使絕裾而去常恨不逢斯人使之殊死臣  
所以冒犯聖旨乞停今授待罪私門長得奉養供給并  
稅臣之懇願塵黷天威不勝惶恐謹遣某官奉表陳讓  
以聞

奉天論延訪朝臣表

陸贄

臣某言賊泚逋誅尚穴宮禁陛下思應宗廟痛傷黎元

仁孝交感至於憤激猥以急務下詢微臣臣雖鄙儒尊  
慕行義荷陛下知己之遇感陛下思理之誠愚衷所懷  
承問輒發不以淺深自揆不以喜怒上虞誠缺於周防  
承順之規是亦忠於陛下一至之分也前奉詔問尋具  
上陳請延羣臣稍與親接廣諮訪之路開諫諍之門通  
壅鬱之情弘採拔之道自獻答奏迨茲彌旬不聞施行  
不賜訓詁未審宸音以爲如何如昧於忖量但務竭盡  
恐由辭理蹇拙不能暢達事情悽悽血誠復願披瀝頻

煩黷冒豈不慙惶蓋犬馬感恩思效之心惓惓而不能  
自止者也臣聞立國之本在乎得衆得衆之要在乎見  
情故仲尼以爲人情者聖王之田理道所由生也是則  
時之否泰事之損益萬化所繫必因人情情有通塞故  
否泰生情有厚薄故損益生通天下之情者莫智於聖  
人盡聖人之心者莫測於易象其列卦也乾下坤上乃  
爲泰乾上坤下則曰否其取象也損上益下則曰益損  
下益上乃爲損乾爲天爲君坤爲地爲臣天在下而地

處上於位乖矣而反謂之泰者上下交故也君在上而臣處下於義順矣而反謂之否者上下不交故也氣不交則庶物不育情不交則萬邦不和天氣下降地氣上騰然後歲功成君澤下流臣誠上達然後理道立損益之義亦由是焉上約已而裕於人人必悅而奉上矣其不謂之益乎上蔑人而肆於己人必怨而叛上矣其不謂之損乎然則上下交而泰不交則否自損者人益自益者人損情之得失豈容易哉故喻君爲舟喻人爲水

言水能載舟亦能覆舟也舟即君道水即人情舟順水之道乃浮違則沒君得人之情乃固失則危是以古先聖王居人之上也必以其心從天下之心而不敢以天下之人從其欲乃至兢兢業業一日萬幾夫幾者事之微也以聖人之德天子之尊且猶慎事之微乃至一日萬慮豈不以居上接下懼失其情歟書曰人心惟危道心唯微則萬幾之慮不得不精也危則覆舟之誠不可不畏也夫揆物以意宣意以言言或是非莫若考於

有迹迹或成敗莫若驗於已行自昔王業盛衰君道得失史冊盡在粲然可徵與衆同欲靡不興違衆自用靡不廢從善納諫靡不固遠賢耻過靡不危故詩書稱堯之德則曰稽於衆捨已從人數舜之功則曰明四目達四聰言務同欲也序禹之所由興則曰益贊於禹禹拜昌言述湯之所以王則曰用人惟已改過不吝言能納諫也歌文王作周則曰濟濟多士文王以寧美武王克殷則曰亂臣十人同心同德言皆從善也堯舜禹湯文

武此六君子天下之盛王也莫不從諫而輔德詢衆以成功是則德益盛而慮益微功愈高而意愈下及代之衰也則道亦反焉故書曰紂有億兆夷人離心離德言違衆也詩曰汝魚休於中國歛怨以爲德不明爾德時無背無側爾德不明以無陪無卿又曰雖無老成人尚有典刑曾是莫聽大命以傾言遠賢也書曰謂人莫已若者亡詩曰惟彼不慎自獨俾臧自有肺腸俾人卒狂言自用也前史數桀紂之惡曰智足以拒諫言足以飾

非言耻過也考得失於已形之跡鑑盛衰於已驗之符孰失道而不衰孰得理而不盛相應以類影響不差敢不則而象之敬而畏之乎自秦漢暨於周隋其間將厯千載代興者非一姓繼覆者非一君雖所遇殊時所爲異跡然失衆必敗得衆必成與堯舜禹湯同務者必興與桀紂幽厲同趣者必覆多同於善則功倍多同於惡則禍甚善惡同類端如貫珠成敗象行明若觀火此厯代之元龜也尚恐議者曰時異事殊臣請復爲陛下粗



舉近效之尤章者以辨焉太宗文皇帝以天縱之才有神器之重武定禍亂文致太平威行如雷霆明照侔日月英畧施於百勝聖功被於九歌固非庶品之所度量常情之所鑽仰然猶兢兢畏慎懼失人心每戒臣下獻規恒以危亡爲慮夙興聽理日旰忘勞公卿迭進延奏庶務評議得失與衆共之下無滯情上無私斷退朝之暇宴接待臣咨訪謀猷詢求過闕或論往古成敗或問人間事情每言及暗主亂朝則省懼自戒言及賢君理

代則企竦思齊言及稼穡艱難則上下相匡務遵勤儉  
言及閭閻疾苦則君臣同慮議息征徭懋德懲違觸類  
滋長尚恐過言謬舉既往難追每召宰輔平章必遣諫  
官俱入小有頗失隨即箴規得一善必遽命甄昇聽一  
諫必明加褒錫故得時無闕事人樂輸誠又引文學之  
流更直宿於內署或謀求典禮或諷誦詩書每至夜分  
情忘厭倦伏以太宗之德美貞觀之理安且猶務得人  
心其勤若此是則人之於理道可一日不接乎高宗初

年亦親聽納故當時翕然歸美以爲有貞觀之風兼賴遺澤在人先範垂裕幸無改作俗以阜康數十年間天下無事承平之業滋久倦怠之意頗彰燕居益深接下彌簡前哲之耿光寢遠中官之威柄潛移卒有嗣聖臨朝天授革命豈不以經邦之道闕疇咨於大猷宴安之懷溺偏信於近狎馴致禍變幾將傾危雖亂匪自他然其失一也弊俗一靡餘風遂流訖神龍景雲之間皆嬖倖亂朝忠義不達玄宗躬定大難手振宏綱開懷納忠

克已從諫尊用舊老廣採羣才大臣不敢壅下情私服不敢干公議朝清道泰垂三十年謂化已成謂安可保耳目之娛漸廣憂勤之志稍衰侈心一萌邪道並進貪權竊柄者則曰德如堯舜矣焉用勞神承意趨利者則曰時已太平矣胡不爲樂有深謀遠慮者謂之迂誕驚衆有讜言切議者謂之誹謗邀名至尊收視於穆清上宰養威於廊廟諫曹以頌義爲奉職法吏以識旨爲當官司司府以厚歛爲公忠權門以多路爲聞望外寵持竊

國之勢內寵擅廻天之淫禍機熾然燄燄滋甚舉天下如居積薪之上人人懼焚而朝廷相蒙曾莫之省日務遊宴方謂有無疆之休大盜一興至今爲梗豈不以忽於戒備逸於居安憚忠鯁之拂心甘諛詐之從欲漸漬不聞其失以至於大失乎肅宗懲致寇之由蘊撥亂之畧虛受廣納同合乎太宗招延詢謀輟食廢寢洞啟城府推心與人豁披胸襟忘已應物故得來蘇之望允塞配天之業勃興先皇帝繼守恭勤而益之以和惠惠則

有感和則有親雖時經艱屯而衆不離析理尚寬大務  
因循而重改作然於紫宸聽朝常限三人奏事時亦宣  
諭德令課責侍臣或賞其盡規或含以容默性本仁恕  
事多弘讓諫雖未從且不深忤情苟有阻終獲上通故  
君臣相安而人亦小息陛下英姿逸辯邁絕人倫武畧  
雄圖牢籠物表憤積習以妨理任削平而在躬以明威  
照臨以嚴法制斷流弊自久浚恒太深遠者驚疑而阻  
命逃死之亂作近者畏懾而媮容避罪之態生君臣意

乖上下情隔君將務理而下防誅夷臣將納忠又上慮欺誕故睿誠不布於羣物物情不達於睿聽臣於往年曾任御史獲奉朝謁僅於半年陛下嚴邃高居未嘗降旨臨問羣臣跼蹐趨退亦不列事奏陳軒墀之間且未相論宇宙之廣何由自通雖復列對使臣別延宰輔既殊師錫且異公言未行者則戒以樞密勿論已行者又謂之遂事不諫漸生拘礙動涉猜嫌由是人各隱情以言爲諱至於變故將起億兆同憂獨陛下恬然不知方

謂太平可致陛下以今日之所觀驗往日之所聞孰真孰虛何得何失則事之通塞備詳之矣人之情僞盡知之矣列聖升降之效歷歷如彼當今理亂之由昭昭如此未有不興於得衆殆於失人裕於僉諧蔽於偏信濟美因乎納諫虧德由乎自賢善始本乎憂勤失人萌乎安汰今陛下將欲悔禍徼福去危從安若不循太宗創業之規襲肅宗中興之理鑑天寶致亂之所以懲今者遷幸之所因則何以孚聖懷揚令聞新遠邇之聽歸反



側之心乎前承德音訪及庸鄙敢緣斯義輒以獻聞自  
邇以來反覆十慮愚智有分信非可移至今拳拳猶滯  
所見不勝愚誠壅欵謹復布露以聞臣惶怖死罪謹言

代李侍郎論兵表

呂溫

臣某言臣伏見某月日詔旨發更太原鳳翔及神策諸  
鎮兵赴劍南東川者陛下睿算無遺神武必斷與人除  
害順天行誅奮如霆之威乘破竹之勢期於久逸無憚  
一勞大正國經永清時禔百王盛事千古英聲天下幸

甚然或時事之可否兵家之利害道途之險易將帥之  
宜稱不可不深圖遠計原始要終狂夫有可擇之言愚  
者有一得之慮管窺所至願效微誠臣竊以爲古今用  
兵皆在將勇師和政齊計勝不必多兵廣衆然後成功  
今高崇文等諸將所統已約一萬五千餘人以整擊亂  
以順討逆授以廟算假之天威馘醜挫凶需有餘力若  
更多征徵鎮廣命師旅臣竊計之其患有五一則高崇  
文素非大將拔自偏鎮忠勇雖著威聲未振本兵既少

兼統則多將皆權隸士非素撫雖是銳師勢若烏合居  
常則猶可協制臨敵則何以指揮非惟崇文才分有限  
此亦自古兵家所難臣不敢廣引載籍上煩聖聽請直  
以近事明之哥舒翰潼關之守郭子儀相州之圍韓全  
義激水之役皆以兵多將雜而致敗歟許叔冀之保靈  
昌李光弼之全河陽李晟之收復京邑皆以兵少將一  
而建大功成敗昭然布在人口二則貞元以來天下無  
事四方節將人各懷安陛下履幘惟新理先清靜今以

西南小醜久稽天誅自春徂夏徵發已廣見在兵力破賊有餘若更務濟師屢聞動衆山險深阻暑溼爲沴北人南役誰不憚行去土離家動生愁怨往年涇原叛卒職此之由事繫安危不可不察三則吐蕃約盟未定窺伺在心間謀往來急於郵傳又必持兩端之計與劉闢交通若聞發兵西南多取邊鎮秋風即至虜馬已肥冒隙乘虛必有侵軼事出萬一悔何可追四則劉闢窮寇保險逃死雖禍淫助順天道甚明而兵凶戰危人事難

必脫或貌武之師少不如意蜂蟻猶聚假息旬時攻守之間動須應援固當潛鋒養銳以逸待勞今便悉兵後將何繼五則劍川硤磻居人食且不充蜀路險艱餉運無由多致今屯兵日費何啻萬金數州麥粟貴糴將盡千里飛輓所濟幾何若更加兵實難供贍一夫脫有菜色三軍無復鬪心幸可少以成功何必多而爲患今太原及神策等軍已上道者其類頗多足辦戎事其鳳翔等鎮未發之兵伏乞聖恩且勒權停續候事宜以議行

止臣謬膺重任過蒙恩遇輒率狂瞽輕黷宸嚴苟利國家甘心鼎鑊無任兢惶懇迫之至謹奉陳奏以聞

論請不用奸臣表

裴度

臣度言臣聞主聖臣直今既遇聖主輒爲臣直上荅殊死下塞羣望誓除國蠹無以家爲苟獻替之可行何性命之足惜伏惟文武孝德皇帝陛下纂承丕業光啟雄圖方殄頑人之風以立太平之事而逆豎構亂震驚山東奸臣作朋撓亂國政陛下欲掃蕩幽鎮先宜肅清朝

廷何者爲患有大小議事有先後河朔逆賊只亂山東  
禁闡奸臣必亂天下是則河朔患小禁闡患大小者臣  
等與諸道戎臣必能剪滅大者非陛下制斷非陛下覺  
悟無計驅除今文武百寮中外萬品有心者無不憤忿  
有口者無不咨嗟直以威權方重獎用方深有所畏避  
不敢抵觸恐事未行而禍已及不爲國計且爲身計者  
耳臣比猶懷隱忍不願發明一則以罪惡如山怨謗如  
雷伏料聖君必自誅殛一則以四方無事萬樞且過紀

綱潛壞賄賂公行待其貫盈必自顛覆今屬克徒擾攘宸衷憂軫凡有制命繫於安危痛此奸臣恣其欺罔干亂聖畧非止一途又與翰苑近臣結爲朋黨陛下聽其所說則必訪於近臣不知近臣已先計會更唱迭和蔽惑聰明所以臣自兵興已來所陳章疏皆是至切所奉書詔多有參差蒙陛下委寄之意不輕被奸臣抑損之事不少臣所與佞倖亦無讐嫌祇是昨者臣請乘傳詣闕面陳戎事奸臣之黨最所畏懼知臣若到御座之前



必能悉數其辜以此百計止臣此行臣又請領兵齊進  
逐便討賊奸臣之黨尤所阻礙恐臣統率諸道或有成  
功進退皆受羈牽意見悉遭杜塞復與一二險狡同辭  
合力令臣失所使臣無成則天下理亂山東勝負悉不  
顧矣爲臣事君一至於此且陛下前後左右忠良至多  
亦有熟會典章亦有飽諳師旅足得任使何獨斯人以  
臣愚見若朝中奸臣盡去則河北逆賊不討而自平若  
朝中奸臣盡在則河朔逆賊雖平益熾臣伏讀國史知

代宗之朝蕃戎侵軼直至畿甸代宗不知蓋被程元振  
壅蔽幾危社稷當時柳伉乃太常一博士耳猶抗表歸  
罪爲國除害今臣所任兼總將相豈可坐觀克邪有曠  
日月臣不勝感恩嫉惡之至謹附中使趙奉國奉表以  
聞儻陛下未甚信臣猶惑奸黨伏乞出臣此表令三事  
大夫與百寮集議彼不受責臣合伏辜天鑒孔明照臣  
肝血但得天下之人知臣不負陛下則臣雖死之日猶  
生之年

進撰平蔡州碑文表

韓愈

臣某言伏奉正月十四日勅牒已收復淮西羣臣請刻石紀功明示天下爲將來法式陛下推勞臣下允其志願使臣撰平淮西碑文者聞命震駭心識顛倒非其所任爲愧爲恐經旬涉月不敢措手中謝竊惟自古聖神之君既立殊功異德卓越之跡必有奇能博辯之士爲時而生持簡操筆從而寫之各有品章條貫然後帝王之美巍巍煌煌充滿天地其載於書則堯舜二典夏

之禹貢殷之盤庚周之五誥於詩則玄鳥長發歸美殷  
宗清廟臣工小大二雅周王是謌辭事相稱善并美具  
號以爲經列之學宮置師弟子讀而講之從始至今莫  
敢指斥嚮使撰次不得其人文字曖昧雖有美實其誰  
觀之辭跡俱亡善惡惟一然則茲事至大不可輕以屬  
人伏以唐至陛下再登太平剗刮羣奸灑掃疆土天之  
所覆莫不賓服然而淮西之功尤爲俊偉碑石所刻動  
流億年必得作者然後可盡能事今詞學之英所在麻

列儒宗文師磊落相望外之則宰相公卿卽官博士內之則翰林禁密游談侍從之臣不可一二遽數召而使之無有不可至於臣者自知最爲淺陋顧貪恩侍趨以就事叢雜乖戾律呂失次乾坤之容日月之光知其不可繪畫強顏爲之以塞詔旨罪當誅死其碑文今已撰成隨表謹錄封進

進元和聖德詩表

韓愈

臣愈頓首再拜言曰臣伏見皇帝陛下卽位以來誅流

姦臣朝廷清明無有欺蔽外斬楊惠琳劉闢以收夏蜀  
東定青徐積年之叛海內佈駭不敢違越郊天告廟神  
靈歡喜風雨明晦無不從順太平之期適當今日臣蒙  
被恩澤日與羣臣序立紫宸殿下親望穆穆之光況其  
職業又在以經籍教導國子誠宜率先作詩以稱述  
盛德不可以詞語淺薄不足以自効爲辭輒依古作四  
言元和聖德詩一篇凡十有二十四字指事實錄具載  
明天子文武神聖以警動百姓耳目傳示無極謹冒昧

塵獻無任惶悚之至

論佛骨表

韓愈

臣某言伏以佛者西竺之一法耳自後漢時流入中國  
上古未嘗有也昔者黃帝在位百年年百一十歲少昊  
在位八十年年百歲顓頊在位七十九年年九十八歲  
帝嚳在位七十年年百五歲帝堯在位九十八年年百  
一十八歲帝舜及禹年皆百歲此時天下太平百姓安  
樂壽考然而中國未有佛也其後殷湯亦年百歲湯孫

太戊在位七十五年武丁在位五十九年書史不言其  
年壽所極推其年數蓋亦俱不減百歲周文王年九十  
七歲武王年九十三歲穆王在位百年此時佛法亦未  
入中國非因事佛而致然也漢明帝時始有佛法明帝  
在位纔十八年耳其後亂亡相繼運祚不長宋齊梁陳  
元魏已下事佛漸謹年代尤促惟梁武帝在位四十八  
年前後三度捨身施佛宗廟之祭不用牲牢晝日一食  
止於菜果其後竟爲侯景所逼餓死臺城國亦尋滅事



佛求福乃更得禍由此觀之佛不足事亦可知矣高祖始受隋禪則議除之當時羣臣材識不遠不能深知先王之道古今之宜推闡聖明以救斯弊其事遂止臣常恨焉伏惟睿聖文武皇帝陛下神聖英武數千百年已來未有倫比即位之初即不許度人爲僧尼道士又不許創立寺觀臣常以爲高祖之志必行於陛下之手今縱未能即行豈可恣之轉令盛也今聞陛下令羣僧迎佛骨於鳳翔御樓以觀昇入大內又令諸寺遞迎供養

臣雖至愚必知陛下不惑於佛作此崇奉以祈福祥也  
直以年豐人樂徇人之心爲京都士庶設詭異之觀戲  
玩之具耳安有聖明若此而肯信此等事哉然百姓愚  
冥易惑難曉苟見陛下如此將謂真心事佛皆云天子  
大聖猶一心敬信百姓何人豈合更惜身命焚頂燒指  
百十爲羣鮮衣散錢自朝至暮轉相倣倣惟恐後時老  
少奔波棄其業次若不即加禁遏更歷諸寺必有斷臂  
齧身以爲供養者傷風敗俗傳笑四方非細事也夫佛

本西竺之人與中國言語不通衣服殊製口不言先王之法言身不服先王之法服不知君臣之義父子之情假如其身至今尚在奉其國命來朝京師陛下容而接之不過宣政一見禮賓一設賜衣一襲衛而出之於境不令惑衆也況其身死已久枯朽之骨凶穢之餘豈宜令人宮禁孔子曰敬鬼神而遠之古之諸侯行弔於其國尚令巫祝先以桃茢祓除不祥然後進弔今無故取朽穢之物親臨觀之巫祝不先桃茢不用羣臣不言其

非御史不舉其失臣實耻之乞以此骨付之有司投諸  
水火永絕根本斷天下之疑絕後代之惑使天下之人  
知大聖人之所作爲出於尋常萬萬也豈不盛哉豈不  
快哉佛如有靈能作禍祟凡有殃咎宜加臣身上天鑒  
臨臣不怨悔無任感激懇悃之至謹奉表以聞臣某誠  
惶誠恐

論捕賊行賞表

韓愈

臣愈言臣伏見六月八日敕以狂賊傷害宰臣擒捕未

獲陛下悲傷震悼形於寢食特降詔書明立條格云有能捉獲賊者賜錢萬貫仍加超授今下手賊等四分之內已得其三其餘兩人蓋不足計根尋蹤跡知自承宗再降明詔絕其朝請又與王士則士平等官八日之制無不行者獨有賞錢尚未賜給羣情疑惑未測聖心聞初載錢置市之日市中觀者日數萬人巡繞瞻視咨嗟歎息既去復來以至日暮百姓小人重財輕義不能深達事體但見不給其賞便以爲朝廷愛惜此錢不守言

信自近傳遠無由辨明且出賞所以求賊今賊已誅斬  
若無人捉獲國家何因得此賊而正刑法也承宗何故  
而賜誅絕也士則士平何故與美官也三事既因獲賊  
獲賊必有其人不給賞錢實亦難曉假如聖心獨有所  
見審知不合加賞其如天下百姓及後代久遠之人哉  
況今元濟承宗尚未擒滅兩河之地大半未收隴右河  
西皆沒戎狄所宜大明約束使信在言前號令指麾以  
圖功利況自陛下即位已來繼有不績斬楊惠琳收夏

州斬劉闢收劍南東西川斬李錡收江東縛盧從史收  
澤潞等五州威德所加兵不汙刃收魏博等六州致張  
茂昭張愔收易定徐泗濠等五州創業已來列聖功德  
未有能高於陛下者可謂赫赫巍巍光照前後矣此由  
天授陛下神聖英武之德爲巨唐中興之君宗廟神靈  
所共祐助勉強不已守之以信則故地不足收而太平  
不難致如乘快馬行平路遲速進退自由其心有所欲  
往無不可者於此之時特宜示人以信孔子欲存信去

食人非食不生尚欲捨生以存信況可無故而輕棄也  
昔秦孝公用商鞅爲相欲富國強兵行令於國恐人不  
信立三丈之木於市南門募人有能徙至北門者與五  
十金有一人徙之輒與五十金秦人以君言爲必信法  
令大行國富兵強無敵天下三丈之木非難徙也徙之  
非有功也孝公輒與之金者所以示其言之必信也昔  
周成王尚小與其弟叔虞爲戲削桐葉爲珪曰以晉封  
汝其臣史佚因請擇日立叔虞爲侯成王曰吾與之戲



耳史佚曰天子無戲言言之則史書之禮成之樂歌之於是遂封叔虞於晉昔漢高祖出黃金四萬斤與陳平恣其所爲不問出入令謀項羽平用金間楚數年之間漢得天下論者皆言漢高祖深達於利能以金四萬斤致得天下以此觀之自古以來未有不信其言而能有大功者亦未有不費少財而能收大利者也臣於告賊之人本無恩義彼雖獲賞了不關臣所以區區盡言不避煩黷者欲令陛下之信行於天下也伏望恕臣愚陋

僻憊之罪而收其懇款誠至之心天下之幸非臣之幸也謹奉表以聞臣愈誠惶誠恐

進平淮夷雅篇表

柳宗元

臣宗元言臣負罪竄伏違尚書箋奏十有四年聖恩寬宥命守遐壤懷印曳紱有社有人臣宗元誠感誠荷頓首頓首伏惟睿聖文武皇帝陛下天造神斷克清大憝金鼓一動萬方畢臣太平之功中興之德推校千古無所與讓臣伏自忖度有方剛之力不得備戎行致死命

況今已無事思報國恩獨惟文章伏見周宣王時稱中興其道彰大於後罕及然徵於詩大小雅其選徒出狩則車攻吉日命官分土則崧高韓奕蒸民南征北伐則六月采芑平淮夷則江漢常武鏗鉤炳耀盪人耳目故宣王之形容與其輔佐由今望之若神人然此無他以雅故也臣伏見陛下自即位以來平夏州夷劍南取江東定河北今又發自天衷克翦淮右而大雅不作臣誠不佞然不勝憤踊伏以朝多文臣不敢盡專數事謹撰

平淮夷雅二篇雖不及尹吉甫召穆公等庶施諸後代  
有以佐唐之光明謹昧死再拜以獻無任兢懼之至臣  
某誠惶誠懼死罪死罪謹言

論陳職表

元稹

臣聞先王之制祿也居其位不行其職者誅是以上無  
虛受下不隱情臣竊觀今時備位素餐不行其職者莫  
過於臣輩臣聞太宗文皇帝時以王珪魏徵爲諫官文  
皇雖宴遊寢食之間王魏實在其所用至於文皇發一

言則王魏詳之而後出舉一事則王魏慮之而後行以  
文皇之明合王魏之智是以舉無遺事言有典常文皇  
猶以爲視聽未廣也因許三品以上入議軍國必遣諫  
官一人隨入以參驗之當是之時耳目股肱之任者有  
君臣之義焉有父母之恩焉有朋友之勸焉是否無不  
替可無不行不四三年而天下大理蠻夷君長帶刀入  
侍者不可勝計豈干戈征伐之所致蓋壅蔽之患銷而  
幽遠之情達也若此然後可以稱天下之爭臣矣近之

司諫爭者則不然大不得備召見次不得參時政排行就列累累而已且臣聞之諫臣之職曰左右前後拾遺補闕大則廷議小則上封近年以來正衙不奏事庶臣罷廷對若此則不見遺闕補拾何階不得敷陳廷議安設其所謂舉諫職者唯獨誥令有不便除授有不當則奏一封執一見而已以臣思之君臣之際論列是非風諭未形籌畫於至密尚不能迴至尊之盛意備讒慝之巧言而況於既行之誥令已命之除授然後執一封奏

一見而私欲收絲綸之詔廻日月之光信無裨於萬一  
矣至使凡今之人以上封進計爲妄動拾遺補闕爲冗  
員此稱供奉官與王珪魏徵爲等列臣雖至愚能不自  
愧且陛下若以爲臣等無所裨補不足參侍從固不當  
假以名器俾立於朝苟以爲務廣聰明稍問理道又不  
宜屏棄疎賤之使至於此伏願陛下許臣以延英候對  
召臣一見賜以溫顏使臣得盡愚懇之誠備陳諫官之  
職苟或言有所採得裨陛下萬分之一是臣千載之一

時也如或言不諳理塵黷聖聰則臣自寘刑書以謝謬  
妄之罪亦臣之所甘心也

爲宰相謝官表

白居易

臣某言伏奉今月日制書授臣守本官同中書門下平  
章事者殊常之命非望之恩出自宸衷加於凡陋竦駭  
震越不知所爲中謝臣伏准近例宰相上後合獻表陳  
謝臣今所獻與衆不同伏惟聖慈特賜留聽臣伏聞玄  
宗即位之初命姚元崇爲宰相元崇欲救時弊獻事十



條未得請間不立相位玄宗明聖盡許行之遂致太平  
實由於此陛下視今日天下何如開元天下微臣自知  
才用亦遠不及元崇若又黽勉安懷因循保位不惟恩  
德是負實亦軍國可憂臣欲候坐對時便陳當今切事  
下救時弊上酬君恩臣之誓心爲日久矣陛下許行則  
進不許則退進退之分斷之不疑敢於事前先此陳啟  
況臣才本庸淺遭遇盛明天心自知不因人進擢居禁  
署訪以密謀恩獎太深讒謗並至雖內省行事無所愧

心然上黷宸聽合當死責豈意憐察曲賜安全螻蟻之  
生得自茲日今越流輩授以台衡拔於萬死之中致在  
九霄之上捫心撫已審分量恩陛下猶不以衆人之心  
待臣臣豈敢以衆人之心事上皇天白日實鑒臣心得  
獻前言雖死無恨無任感恩懇款之至

爲崔中丞進白鼠表

李丹

臣某言以今月某日於所部宣城縣謝亭鄉百姓姚德  
家獲白鼠一素毛毳然淨若冰雪體貌閒暇異於其倫

臣謂白者少陰之色也鼠者陰物奸人之象也夫以晝伏  
夜動之質穴社穿墉之姿而乃稟金方之正色投籠檻  
以馴擾此蓋小人革性之端西戎授首之符臣某中謝  
臣又聞白虎白鼠皆金行之象也且獸之大者莫勇於  
虎獸之小者莫怯於鼠前志有之曰用之則如虎不用  
則如鼠則虎之與鼠其類之極乎臣愚以爲天之意者  
又以鼠警陛下耳夫西戎猾夏者乘金方沴氣也陛下  
若臨之以律防之以時則雖強如虎將弱如鼠矣陛下

若臨之失律防之後時則雖弱如鼠將強如虎矣今西  
戎未滅秋律始行伏願陛下鑒上天之炯誠納微臣之  
芻詞考金行從革之儀徵虎鼠強弱之勢則當西極月  
窟率來王矣況復蠢爾西戎乎

文章辨體彙選卷一百二十九

欽定四庫全書

文章辨體彙選卷一百三十

明 賀復徵 編

表六

進大明律表

明宋濂

臣聞天生蒸民不能無欲欲動情勝詭僞日滋強暴縱其侵陵柔懦無以自立故聖人者出因時制治設刑憲以爲之防欲使惡者知懼而善者獲寧傳所謂獄者萬

民之命所以禁暴止邪養育羣生者也譬諸禾黍必刈  
稂莠而後苗始茂方於白粲必去砂礫而後食可飡苟  
梗化敗俗之徒不有以誅之雖堯舜不能以爲治夫自  
軒轅以來代有刑官而五刑之法漸著其詳弗可復知  
逮魏文侯師於李悝始采諸國刑典造法經六篇漢蕭  
何加以三篇通號九章曹魏劉邵又衍漢律爲十二篇  
晉賈充又參魏律爲二十篇唐長孫無忌等又取漢魏  
晉三家擇可行者定爲十二篇大槩皆以九章爲宗歷

代之律至於唐亦可謂集厥大成矣洪惟皇帝陛下受  
億君師之命登大寶位保乂臣民孳孳弗怠其訓迪羣  
臣諄復數十言惟恐其有犯慈愛仁厚之意每見於言  
外是大舜惟刑之恤之義也矜閔愚民無知陷於罪戾  
法司奏讞輒惻然弗寧多所寬宥是神禹見辜而泣之  
心也惟貪墨之吏承踵元弊不異白粲中之砂礫禾黍  
中之稂莠也乃不得已假峻法以繩之是以臨御以來  
屢詔大臣更定新律至五六而弗倦者凡欲生斯民也



今又特勅刑部尚書劉惟謙重會衆律以協厥中而近代比例之繁姦吏可資爲出入者咸痛革之每一篇成輒繕書上奏揭於西廡之壁親御翰墨爲之裁定由是仰見陛下仁民愛物之心與虞夏帝王同一哀矜也易曰山上有火旅君子以明慎用刑而不留獄言獄不可不謹也書曰刑期於無刑言辟以止辟而民自不敢犯也陛下聖慮淵深上稽天理下揆人情成此百代之準繩實有易書之興旨行見好生之德洽於民心凡日月

所照霜露所墜有血氣者莫不上承神化改過遷善而  
悉臻雍熙之治矣何其盛哉臣惟謙以洪武六年冬十  
一月受詔明年二月書成篇目一準之於唐曰名例曰  
衛禁曰職制曰戶婚曰廩庫曰擅興曰賊盜曰鬪訟曰  
詐僞曰雜律曰捕亡曰斷獄采用已頒舊律二百八十  
八條續律百二十八條舊令改律三十六條因事制律  
三十一條掇唐律以補遺一百二十三條合六百有六  
分爲三十卷其間或損或益或仍其舊務合重輕之宜

謹奉表

謝恩表

劉基

伏以出草萊而遇真主受榮寵而歸故鄉此人人之所願欲而不可得者也中謝欽惟皇帝陛下以聖神文武之姿提一旅之衆龍興淮甸掃除羣雄不數年間遂定中原奄有四海神謨廟斷悉出聖衷舜禹以來未之有也臣基一介愚庸生長南裔踈拙無似其能識主於未發之先者亦猶巢鵲之知太歲園葵之企太陽以管窺

天偶見於此非臣之知有過於人也至於仰觀乾象言  
或有驗者是乃天以大命授之陛下若有鬼神陰誘臣  
衷開導使言非臣念慮所能及也聖德廣大不遺封菲  
遠法唐虞功疑惟重之典錫臣以封爵賜臣以實祿俾  
臣回還故鄉受榮寵以終其天年臣竊自揆何修而膺  
此犬馬微忱惟增愧懼已於洪武四年二月初四日到  
家謹遣長男璉捧表詣闕拜謝聖恩臣基無任激切屏  
營之至謹奉表稱謝以聞

進五經四書性理大全表

胡廣

伏以六經之道昭如日星經緯乎天地貫徹乎古今放  
之則彌六合卷之則退藏於密用之於身而身修行之  
於家而家齊推之於國而國治施之於天下而天下平  
蓋世必窮經而後道明未有舍經而能治理者也是以  
聖王垂憲必資道以開人賢哲肇基必稽古以作範故  
伏羲則河圖而演畫大禹因洛書而錫疇孔子刪詩書  
修春秋寓一王之法周公陳王業制禮樂弘百世之規

況乎精一執中之傳尤重丁寧告戒之旨如斯顯迹昭然可觀自王道既衰異說遽起燔烈秦火之餘穿鑿漢儒之弊其間存者不絕如絲莫能究其旨歸一切趨於苟且夤緣故習鮮克正之於乎聖人之道不行而百世無善治聖人之學不傳而千載無真儒遂令往轍之難尋益發前修之永嘆夫否必有泰晦必有明繇夫濫洛關閩之學興而後堯舜禹湯之道著悉掃秦蕪之弊大開正學之宗不幸屢扼狂言既揚復抑又因循數百年

之間卒莫能會其說於一蓋必有待於今日者矣天啟  
聖明誕膺景運我太祖高皇帝天縱之聖以武功定天  
下以文教興太平首建學校頒賜書籍作養人才茂隆  
政治四海外內翕然同風欽惟皇帝陛下文武聖神聰  
明睿知繼成大統紹述鴻勲成功盛德雖三皇而無以  
加事業文章與二儀而同其大治已至而猶以爲未至  
功已成而猶以爲未成體道謙冲遊心高遠乃者渙啟  
宸斷修輯六經恢拓道統之源流大振斯文之委靡發

揮幽蹟鉤纂精玄博米先儒之格言以爲前聖之輔翼  
合衆塗於一軌會萬理於一原地負海涵天清日暎以  
是而興教化以是而正人心使夫已斷不續之墜緒復  
屬而復聯已晦不明之微蘊復彰而復著肇建自古所  
無之制作續述自古所無之事功非惟備講於經筵實  
欲頒布於天下俾人皆由於正路而學不惑於他岐家  
孔孟而戶程朱必獲真儒之用佩道德而服仁義咸趨  
聖域之歸頓回太古之淳風一洗相沿之陋習煥然極



備猗歟盛哉竊嘗觀之周衰道廢汲汲皇皇以斯道維持世教者惟師儒君子而已未有大有爲之君能倡明六經之道紹承先聖之統如今日者此皇帝陛下所以卓冠百王超軼千古者也臣廣等幸逢熙洽之時謬忝校勘之任每受成於指教亦何假於施爲樂觀就編豈勝歡慶尊所聞行所知求不負於教育正其誼明其道期補報於昇平

進千家姓表

吳況

臣沉等言臣聞古者天子建德因生賜姓胙土命氏此  
姓氏所由興也三代以前有姓以別婚姻氏以辨貴賤  
所由來尚矣三代以後姓氏寢廣推原其始有以帝王  
名號爲氏者有以王父字爲氏者有以所生之土爲氏  
者有以官有以爵及謚爲氏者有以所封之國若邑若  
鄉若亭爲氏者有以技以物爲氏者故往往姓同而氏  
則分年代既遠族類益繁於是以氏爲姓而索之族矣  
歷漢唐宋元生齒之盛華夷之混又有以部落爲姓者

有因功賜姓者有因過因事因刑改姓者有避諱避仇  
避難避嫌改姓者有慕前賢名字冒姓者有音訛及音  
同文異或文同音異轉姓者有省文省言轉姓者其區  
分類別不可勝紀前代雖有氏族志等書流行於世類  
皆蒐羅未盡互有詳畧識者病之恭惟皇帝陛下誕膺  
天命混一區宇車書萬里溥海內外遐陬僻壤咸沾沐  
聖化安土樂生黎庶阜蕃又非前代之比臣等謹稽諸  
史謀質之圖籍旁搜博采類萃成篇約爲韻語凡爲姓

一十九百六十有八名曰千家姓繕寫呈上極慚膚淺  
未能悉備萬幾之暇得賜覽觀刊布四方以便初學習  
讀天下之人有以知聖朝土地廣大人民衆盛恩德深  
厚而思各保其族於悠久以同躋仁壽之鄉也

陳情表

簡祖英

臣祖英九歲失怙惟慈親鞠育逮長知訓冀或用世以  
酬罔極臣之志也向叨食元祿爲何左丞參佐適值三  
山強寇剽掠廣城一門妻女死節五人而老母陳氏爲

所拘囚臣祖英隱忍不能即死其有愧石苞狗國也多  
矣茲遇聖朝維新征討不服率土效順咸蒙嘉休乃者  
三山逆寇悉嬰鐵鎖臣母得以生還雖臣祖英不孝之  
罪固所難逃而得以展區區烏哺情私者陛下之賜也  
臣母子離散復完白骨復肉銘感聖德徹於肝肺雖九  
死其能報邪陛下又復甄錄寄以民社此正臣殞首效  
命之秋也而臣俛顧自慙不敢拜命者以罪戾已深不  
宜職在民牧欽惟聖朝以孝道治天下祿秩不容及不

孝之徒以仁心懷遠人匹夫無有不獲之願況臣事元朝叨爲元臣幸已逃誅母年逾耄孤苦特甚尤宜惻怛而欽恤者也伏望聖慈收卬成命矜其愛日之短俾遂歸養之圖則母子拭目清平謳歌德澤爲賜多矣今臣年四十有九老母年八十有一鶴髮垂堂西山之日已薄棄親赴任不孝之罪彌深苟違親而事主陛下安所用之果盡奉歡之期然後復求仕進以盡忠罄節非惟遂人子之私亦聖朝孝理之道也

文章辨體彙選卷一百三十

欽定四庫全書

文章辨體彙選卷一百三十一

明 賀復徵 編

表七

以下俱今體

謝平原內史表

晉陸機

陪臣陸機言今月九日魏郡太守遣兼丞張含齋板詔  
書印綬假臣為平原內史拜受祇竦不知所裁臣本出  
自敵國世無先臣宣力之效才非丘園耿介之秀皇澤



廣被惠濟無遠擢自羣萃累蒙榮進入朝九載厯官有  
六身登三閣宦成兩宮服冕乘軒仰齒貴游振景拔迹  
顧邈同列施重山岳義足灰沒遭國顛沛無節可紀雖  
蒙曠盪臣獨何顏俛首頓膝憂愧若厲而橫為故齊王  
同所見枉陷誣臣與衆人共作禪文幽執圜圉當為誅  
始臣之微誠不負天地倉卒之際慮有逼迫乃與弟雲  
及散騎侍郎袁瑜中書侍郎馮熊尚書右丞崔基廷尉  
正顧榮汝陰太守曹武思所以獲免陰蒙避迴崎嶇自

列片言隻字不關其間事蹤筆跡皆可推校而一朝翻  
然更以為罪藪爾之生尚不足為區區本懷實有可悲  
畏逼天威即罪惟謹鉗口結舌不敢上訴所天莫大之  
繫日經聖聽肝血之誠終不一聞所以臨難慷慨而不  
能不恨恨者唯此而已重蒙陛下豈弟之宥迴霜叔電  
使不隕越復得扶老攜幼生出獄戶懷金拖紱退就散  
輩感恩惟谷五情震悼跼天躋地若無所容不悟日月  
之明遂垂曲照雲雨之澤播及朽瘁忘臣弱才身無足

采哀臣零落罪有可察苟削丹書得夷平民則塵洗天  
波謗絕衆口臣之始望尚未至是猥辱大命顯授符虎  
使春枯之條更與秋蘭垂芳陸沉之羽復與荆鴻撫翼  
雖安國免徒起紆青組張敞亡命坐致朱軒方臣所荷  
未足為泰豈臣蒙垢含吝所宜忝竊非臣毀宗夷族所  
能上報喜懼參并悲慙哽結拘守常憲當便道之官不  
得束身奔走稽顙城闕瞻係天衢馳心輦轂臣不勝屏  
營延仰謹拜表以聞

為吳令謝詢求為諸孫置守冢人表

張俊

臣聞成湯草夏而封杞武王入殷而建宋春秋征伐則  
晉修虞祀燕祭齊廟夫一國為一人興先賢為後愚廢  
誠仁聖所哀悼而不忍也故三王敦繼絕之德春秋貴  
柔服之義昔漢高受命追存六國凡諸絕祚一時並祀  
親與項羽對爭存亡逮羽之死臨哭其喪將以位嘗侔  
尊力嘗均勢雖功奪其成而恩與其敗且暴興疾顛禮  
之若舊殘戮之尸乃以公葬若使羽位承前緒世有哲

王一朝力屈全身從命則楚廟不墮有後可冀伏惟大  
晉應天順民武城止戈西戎有即叙之人京邑開興蜀  
之館興滅加乎萬國繼絕接於百世雖三王弘道商周  
稱仁洋洋之美未足以喻是以孫氏雖家失吳祚而族  
蒙晉榮子弟量才並肩進取懷金侯服佩青千里當時  
受恩多有過望臣聞春雨潤木自葉流根鵠鴉恤功愛  
子及室故天稱罔極之恩聖有綢繆之惠追惟吳偽武  
烈皇帝遭漢室之弱值亂臣之彊首倡義兵先衆犯難

破董卓於陽人濟神器於甄井威震羣校名顯往朝桓  
王才武弱冠承業招百越之士奮鷹揚之勢西赴許都  
將迎幼主雖元勲未終然至忠已著夫家積義勇之基  
世傳扶危之業進為狗漢之臣退為開吳之主而蒸嘗  
絕於三葉園陵殘於薪米臣竊悼之伏見吳平之初明  
詔追錄先賢欲封其墓愚謂二君並宜應書故舉勞則  
力輸先代論德則惠存江南正刑則罪非晉寇從坐則  
異世已輕若列先賢之數蒙詔書之恩裁加表異以寵

亡靈則人望克厭誰不曰宜二君私奴多在墓側今為  
平民乞差五人蠲其徭役使四時修護頽毀埽除塋壟  
永以為常

勸進表

劉琨

建興五年三月癸未朔十八日辛丑使持節散騎常侍  
都督河北并冀幽三州諸軍事領護軍匈奴中郎將司  
空并州刺史廣武侯臣琨使持節侍中都督冀州諸軍  
事撫軍大將軍冀州刺史左賢王渤海公臣匹磾頓首

死罪上書臣琨臣匹碑頓首頓首死罪死罪臣聞天生  
蒸民樹之以君所以對越天地司牧黎元聖帝明王鑒  
其若此知天地不可以乏饗故屈其身以奉之知黎元  
不可以無主故不得已而臨之社稷時難則戚藩定其  
傾郊廟或替則宗哲纂其祀所以弘振遐風式固萬世  
三五以降靡不由之臣琨臣匹碑頓首頓首死罪死罪  
伏惟高祖宣皇帝肇基景命世祖武皇帝遂造區夏三  
葉重光四聖繼軌惠澤侔於有虞卜年過於周氏自元



康以來艱禍繁興永嘉之際氛厲彌昏宸極失御登遐  
醜裔國家之危有若綴旒賴先后之德宗廟之靈皇帝  
嗣建舊物克甄誕授欽明服膺聰哲玉質幼彰金聲夙  
振冢宰攝其綱百辟輔其治四海想中興之美羣生懷  
來蘇之望不圖天不悔禍大災荐臻國未忘難寇害尋  
興其時劉曜縱逸西都敢肆狂悖陵虐天邑臣等奉表  
使還仍承西朝以去年十一月不守主上幽劫復沉虜  
廷神器流離再辱荒逆臣每覽史籍觀之前載厄運之

極古今未有苟在食土之毛含氣之類莫不叩心絕氣  
行號巷哭況臣等荷寵三世位厠鼎司承問震惶精爽  
飛越且悲且惋五情無主舉哀朔垂上下泣血臣琨臣  
匹磾頓首頓首死罪死罪臣聞昏明迭用否泰相濟天  
命未改厯數有歸或多難以固邦國或殷憂以啟聖明  
齊有無知之禍而小白為五霸之長晉有驪姬之難而  
重耳主諸侯之盟社稷靡安將必有以扶其危黔首幾  
絕必將有以繼其緒伏惟陛下玄德通於神明聖安合

於兩儀應命世之期紹千載之運夫符瑞之表天人有  
徵中興之兆圖讖垂典自京畿隕喪九服崩離天下囂  
然無所歸懷雖有夏之遘夷羿宗姬之離戎患蔑以過  
之陛下撫寧江左奄有舊吳柔服以德伐叛以刑抗明  
威以攝不類伏大順以肅宇內絕化既敷則率土宅心  
義風既暢則遐方企踵百揆時序於上四門穆穆於下  
昔少康之隆夏訓以為美談宣王之興周詩以為休詠  
况茂勲格於皇天清輝光於四海蒼生顒然莫不欣戴

聲教所加願為臣妾者哉且宣皇之崩惟有陛下億兆攸歸曾無與二天祚大晉必將有主主晉祀者非陛下而誰是以邇無異言遠無異望謳歌者無不吟詠徽猷獄訟者無不思感聖德天地之際既交華裔之情允洽一角之獸連理之木以為休徵者蓋有百數冠帶之倫要荒之衆不謀而同辭者動以萬計是以臣等敢考天地之心因函夏之趣味死以上尊號願陛下存舜禹至公之情狹巢由抗矯之節以社稷為務不以小行為先

以黔首為憂不以克讓為事上以慰宗廟乃顧之懷下  
以釋普天傾首之望則所謂生繁華於枯蔑育豐肌於  
朽骨神人獲安無不幸甚臣琨臣匹磾頓首頓首死罪  
死罪臣聞尊位不可久虛萬幾不可久曠虛之一日則  
尊位以殆曠之決辰則萬幾以亂方今鍾百王之季當  
陽九之會狡寇窺窬伺國瑕隙齊民波蕩無所繫心安  
可以廢而不恤哉陛下雖欲逡巡其若宗廟何其若百  
姓何昔惠公虜秦晉國震駭呂卻之謀欲立子圉外以

絕敵人之志內以固闔境之情故曰喪君有君羣臣輯  
揚好我者勸惡我者懼前事之不忘後代之元龜也陛  
下明並日月無幽不燭深謀遠慮出自胸懷不勝犬馬  
憂國之情遲覩人神開泰之路是以陳其乃誠布之執  
事臣等各忝守方任職在遐外不得陪列闕廷共觀盛  
禮踊躍之懷南望罔極謹上臣琨謹遣兼左長史右司  
馬臣溫嶠主簿臣辟閭訓臣匹磾遣散騎常侍征虜將軍  
清河太守領右長史高平亭侯臣榮劭輕車將軍關內

侯臣郭穆奉表臣琨臣匹磾頓首頓首死罪死罪

薦譙元彥表

桓溫

臣聞太朴既虧則高尚之標顯道喪時昏則忠貞之義彰故有洗耳投淵以振玄邈之風亦有秉心矯迹以敦在三之節是故上代之君莫不崇重斯軌所以篤俗訓民靜一流競伏惟大晉應符御世運無常通時有屯蹇神州丘墟三方圯裂兇且絕饗於中林白駒無聞於空谷斯有識之所悼心大雅之所歎息者也陛下聖德嗣

興方恢天緒臣昔奉役有事西土鯨鯢既懸思宣大化  
訪諸故老搜揚潛逸庶武羅於羿浞之墟想王燭於亡  
齊之境竊聞巴西譙秀植操貞固抱德肥遯揚清渭波  
於時皇極邁道消之會羣黎蹈顛沛之艱中華有顧瞻  
之哀幽谷無遷喬之望山命屢招姦威仍逼身寄虎吻  
危同朝露而能抗節玉立誓不降辱杜門絕迹不面偽  
庭進免龔勝亡身之禍退無薛方詭對之譏雖園綺之  
棲商洛管寧之默遼海方之於秀殆無以過於今西土



以為美談夫旌德禮賢化道之所先崇表殊節聖詰之上務方今六合未康豺豕當路遺黎偷薄義聲不聞益宜振起道義之徒以敦流遜之敝若秀蒙蒲帛之徵足以鎮靜頽風軌訓囂俗幽遐仰流九服知化矣

侍郎滿辭閣表

宋 鮑照

臣言臣所居職限滿今便收迹金闕雲路從茲自遠鮪經沉藏方絕光景祇戀遲迴結涕濡泗臣器机窮賤情嗜踳昧身弱涓玆地幽井谷本應守業壑畛剿仍收雞

圜豕以給征賦而幼性猖狂因頑慕勇釋擔受書廢耕  
學文畫虎既敗學步亡成反拙歸跛還陋燕雀日晏途  
遠塊然自喪加以亡良根孤伎薄既同馮衍負困之累  
復抱相如消渴之疾志逐運離事與襄合束馬埋輪絕  
遊息世宿福餘慶爰邁聖明煦蒸霜霰等甲雲露得從  
下走叨迹人行操勒負羈班榮扈隸矜愚訓短哀有弗  
及奉此而歸足以沒齒雖摩肌髮亡報天德更冀營魂  
還能結草不勝感戀之情謹詣闕庭拜疏奉辭以聞

謝隨恩被原表

鮑照

臣言即日被曹宣命元統內外五刑以下浩澤盪汰臣亦預焉得從漢律故謬之辨閭遭周典肆責之科大喜卒至非願所圖魚鰥難睨且悚且慚臣誠下愚不達義方然君尊臣泰豈同犬馬且常侍臣淵穉疏草即臣所作助人為恭猶加敬憶自己率禮寧敢漫忘由臣忤賤可悔可誣曾參殺人臣豈亡過寢病幽栖亡援朝列身孤節卑易成論破幸大明臨下仁道毓物澤洎翺走臣

覃末慶然古人有言楊者易生之木也一人植之十人拔之亡生楊矣何者植之者難拔之者易況臣一植之功不立衆拔之過屢至同彼風霜異此貞脆書稱天秩有禮易載坤福在謙臣之謙禮理謝福秩仰銜俯媿行歎坐戚即欲顛沛拜恩下庭但臣病久柴羸不堪冒涉小得趨馳星駕登路不勝荷佩之誠謹上疏以聞

廣州薦士表

陸徽

臣聞陵雪褒穎貞柯必振尊風賞流清原斯挹是以衣

囊揮譽於西京折轅延高於東帝伏見廣州別駕從事  
史朱萬嗣年五十三字少豫理業冲夷秉操純白行稱  
私庭能著官政雖氏非世祿官無通資而隨牒南服位  
極僚首九綜州綱三端府職頻掌蕃機屢績符守年暨  
知命廉尚愈高氷心與貪流爭激霜情與晚節彌茂歷  
宰金山家無寶鏤之飾連組珠海室靡璫珥之珍確然  
守志不求聞達實足以澄草汙吏洗鏡貪氓臣謬忝司  
牧任專萬里雖情祇慎擢才闕豪露敢罄愚陋舉其所

知如得提名禮聞抗迹朝省搏嶺表之清風負永宇之  
潔望則恩融一臣而施光萬物敢緣天澤雲行時德雨  
施每甄外州榮加遠國是以獻其瞽言布垂聽覽

輔政上銓序表

齊蕭衍

表曰臣聞以言取士士飾其言以行取人人竭其行所  
謂才生於代窮達惟時而風流遂往馳騫成俗媒蘖夸  
衒利盡錐刀遂使官人之門肩摩轂擊豈直暴露冠  
不避寒暑遂乃戢屨杖策風雨必至良由鄉舉里選不

師古始稱肉度骨遺之管庫加以山河梁畢闕輿徵之  
恩金張許史忘舊業之替吁可傷哉且夫諧諛訛誤詐  
偽多緒人物雅俗莫肯留心是以冒襲良家即成冠族  
妄修邊幅便為雅士負俗深累遽遭寵擢墓木已拱方  
被徽榮故前代選官皆立選簿應在貫魚自有銓次胄  
籍升降行能臧否或素定懷抱或得之餘論故得簡通  
賓客無事埽門頃代陵夷九流乖失其有勇退忘進懷  
質抱貞者選部或以未經朝謁難於進用或有晦善藏

聲自理衡華又以名不素著絕其階緒必須畫刺投狀  
然後彈冠則是驅迫廉撓獎成澆競愚謂自今選曹宜  
精隲括依舊立簿使冠履無爽名實不違庶人識崖浹  
造請自息且聞中間立格甲族以二十登仕後門以過  
立試吏求之愚懷抑有未達何者設官分職惟才是務  
若八元立年居阜隸而見抑四凶弱冠處鼎族而宜甄  
是則世祿之家無意為善布衣之士肆心為惡豈所以  
弘獎風流希向後進此實巨蠹尤宜刊革不然將使周



人有路傍之泣晉臣興漁獵之嘆且俗長浮競人寡退  
情若限歲登朝必增年就宦故貌實昏童藉已踰立滓  
穢名教於斯為甚臣總司內外憂責是任朝政得失義  
不容隱伏願陛下垂聖淑之姿降聽覽之末則彛倫自  
穆憲章惟允

文章辨體彙選卷一百三十一

欽定四庫全書

文章辨體彙選卷一百三十二

明 賀復徵 編

表八

為齊明皇帝讓宣城郡公第一表

梁任昉

臣鸞言被臺司召以臣為侍中中書監驃騎大將軍開府儀同三司揚州刺史錄尚書事封宣城郡開國公食邑三千戶加兵五千人臣本庸才智力淺短太祖高皇

帝篤猶子之愛降家人之慈世祖武皇帝情等布衣寄  
深同氣武皇大漸實奉詒言雖自見之明庸近所蔽愚  
夫一至偶識量已實不忍自固於綴衣之辰拒違於玉  
几之側遂荷顧托導揚末命雖嗣君棄常獲罪宣德王  
室不造職臣之由何者親則東牟任惟博陸徒懷子孟  
杜稷之對何救昌邑爭臣之譏四海之議於何逃責且  
陵土未乾訓誓在耳家國之事一至於斯非臣之尤誰  
任其咎將何以肅拜高寢虔奉武園悼心失圖泣血待

旦寧容復徽榮於家恥宴安於國危驃騎上將之元勲  
神州儀刑之列岳尚書古稱司會中書實管王言且虛  
飾寵章委成禦侮臣知不愜物誰謂宜但命輕鴻毛責  
重山岳存歿同歸毀譽一貫辭一官不減身累增一職  
已黷朝經便當自同國體不為飾讓至於功均一匡賞  
同千室光宅近甸奄有全邦隕越為期不敢聞命亦願  
曲留降監即垂順許鉅平之懇誠彌固永昌之丹慊或  
申乃知君臣之道綽有餘裕苟曰易昭敢守難奪故可

庶心弘議酌已親物者矣不勝荷懼屏營之誠謹附某  
官某甲奉表以聞

為范尚書讓吏部封侯第一表

任昉

臣雲言被尚書召以臣為散騎常侍吏部尚書封霄城  
縣開國侯食邑千戶奉命震驚心頗無措中謝臣素門  
凡流輪翮無取進謝中庸退慚狂狷固嘗鑽厲求學而  
一經不治篆刻為文而三冬靡就員書燕魏空殫菽粟  
躡屨齊楚徒知貧賤既而分虎出守以囊被見嗤持斧

作牧以蕙苾興謗赭衣為虜見獄吏之尊除名為民知  
井臼之逸百年上壽既曰徒然如其誠悅亦以過半亂  
離斯虞欲以安歸閉門荒郊再離寒暑兼以東臯數畝  
控帶朝夕關外一區悵望鍾阜雖室無趙女而門多好  
事祿微賜金而歡同娛老折芟燔枯此焉自足陛下應  
期萬世接統千祀三千景附八百不謀臣釁等離心功  
慚同德泥首在顏輿棺未毀締構草昧敢叨天功獄訟  
謳歌示同民志而隆器大名一朝總集顧已及躬何以

臻此政當以接閑白水列宅舊豐忘捨講之尤存諸公  
之費俯拾青紫豈待明經臣雲中謝夫銓衡之重關諸  
隆替遠惟則哲在帝猶難漢魏以降達識繼軌雅俗所  
歸唯稱許郭拔十得五尚曰比肩其餘得失未聞偶察  
童幼天機暫發固無足算在魏則毛玠公方居晉則山  
濤識量以臣況之一何遼落齊李陵遲官方淆亂鴻都  
不綱西園成市金章有盈筭之談華貂申不足之歎草  
創惟始義存改作恭已南面責成斯在豈宜妄加寵私

以乏王事附蟬之飾空成寵章求之公私授受交失近  
世侯者功緒參差或足食關中或成軍河內或制勝帷  
幄或門人加親或與時抑揚或隱若敵國或策定禁中  
或功成野戰或盛德如卓茂或師道如桓榮四姓侍  
祠已無足紀五侯外戚且非舊章而臣之所附唯在恩  
澤旣義異疇庸實榮乖儒者雖小人貪幸豈獨無心臣  
本自諸生家承素業門無富貴易農而仕乃祖玄平道  
風秀世爰在中興儀刑多士位裁元凱任止牧伯高祖



少連夙秉高尚所富者義所乏者時薄宦東朝謝病下  
邑先志不忘愚臣是庶且去歲冬初國學之老博士耳  
今茲首夏將亞冢司雖千秋之一日九遷荀爽之十旬  
遠至方之微臣未為速達臣雖無識唯利是視至於虧  
名損實為國為身知其不可不敢妄冒陛下不棄管蒯  
愛同絲麻儻平生之言猶在聽覽宿心素志無復貳辭  
矜臣所乞特迴寵命則彝章載穆微物知免臣今在假  
不容詣省不任荷懼之至謹奉表以聞

為蕭揚州作薦士表

任昉

臣王言臣聞求賢暫勞垂拱永逸方之疏壤取類導川  
伏惟陛下道隱旒纁信允符璽六飛同塵五讓高世白  
駒空谷振鷺在庭猶懼隱鱗卜祝藏器屠保物色闕下  
委裘河上非取製於一狐諒求味於兼采而五聲倦響  
九工是詢寢議廟堂借聽輿阜臣位任隆重義兼家邦  
實欲使名實不違徼倖路絕勢門上品猶當格以清談  
英俊下僚不可限以位貌竊見祕書丞琅琊臣王暕年

二十一字思晦七葉重光海內冠冕神清氣茂允廸中和叔寶理遣之談彥輔名教之樂故以暉映先達領袖後進居無塵雜家有賜書辭賦清新屬言玄遠室邇人曠物疎道親養素丘園台階虛位庠序公朝萬夫傾望豈徒荀令可想李公不亡而已哉前晉安郡侯官令東海王僧儒年三十五理尚棲約思致恬敏既筆耕為養亦傭書成學至乃集螢映雪編蒲緝柳先言往行人物雅俗甘泉遺儀南宮故事畫地成圖抵掌可述豈直繼

鼠有必對之辯竹書無落簡之謬陳坐鎮雅俗弘益已  
多僧儒訪對不休質疑斯在並東序之秘寶瑚璉之茂  
器誠言以人廢而才實世資臨表悚戰猶懼未允不任  
下情

為褚諮議蔡讓代兄襲封表

任昉

臣蔡言昨被司徒符仰稱詔旨許臣兄貢所請以臣襲  
封南康郡公臣門籍勲蔭光錫土宇臣貢世載承家允  
膺長德而深鑒止足脫屣千乘遂乃遠謬推恩近華庸

薄能以國讓弘義有歸匹夫難奪守以無貳昔武始迫  
家臣之策陵陽感鮑生之言張以誠請丁為理屈且先  
臣以大宗絕緒命臣出纂傍統稟承在昔理絕終天永  
惟情事觸目崩隕若使賁高延陵之風臣忘子臧之節  
是廢德舉豈曰能賢陛下察其丹款特賜停絕不然投  
身草澤苟遂愚誠耳不任丹慊之至謹詣闕拜表以聞  
臣誠惶誠恐

為范始興作求立太宰碑表

任昉

臣雲言原夫存樹風猷沒著徽烈既絕故老之口必資  
不刊之書而藏諸名山則陵谷遷貿府之延閣則青編  
落簡然則配天之迹存乎泗水之上素王之道紀於沂  
川之側繇是崇師之義擬迹於西河尊主之情致之於  
堯禹故精廬妄啟必窮鐫勒之盛君長一城亦盡刊刻  
之美况乎甄陶周召孕育伊顏故太宰竟陵文宣王臣  
某與存與亡則義形社稷嚴天配帝則周公其人體國  
端朝出藩入守進思必告之道退無苟利之專五教以

倫百揆時序若夫一言一行盛德之風琴書藝業述作之茂道非兼濟事止樂善亦無得而稱焉人之云亡忽移歲序鴟鴞東徙松檟成行六府臣僚三藩士女人畜油素家懷鉛筆瞻彼景山徒然望慕昔晉氏初禁立碑魏舒之亡亦從班列而阮略既泯故首冒嚴科為之者竟免刑戮置之者反蒙嘉歎至於道被如仁功叅微管本宜在常均之外故太宰淵丞相嶷親賢並軌即為成規乞依二公前例賜許刊立寧容使長想九原樵蘇罔

夫其禁駐蹕長陵輜軒不知所適臣里閭孤賤才無可  
甄值齊網之弘弛賓客之禁策名委質忽焉二紀慮先  
犬馬厚恩不答而弊帷毀蓋未辱螻蟻珠襦玉匣遽師  
幽泉陛下弘獎名教不隔微物使臣得駿奔南浦長號  
北陵既曲逢前施實仰覲後澤儻驗杜預山頂之言庶  
存馬駿必拜之感臨表悲思言不自宣

求為劉瓛立館表

任昉

昔在魏中爰及晉始書貴虛玄人悅陶縱瑚璉廢泗上



之容樽俎恣林下之適春千秋羽委曠而弗陳西序東  
膠寂寥而誰仰所以金雞忘曉玉羊失馭神器毀於獫  
戎寶厯遷於于越豈不悲歟劉歊澡身浴德修行明經  
賤珪璧於光陰竟松筠於歲晚貧不隕獲其心窮不二  
三其操而困無居止浮寓親游垣棟傾替室衢墊側有  
朋自遠無用棲憑皆負笈擔簦櫛風沐露歊之器學無  
謝前修輒欲與之周旋開館招屈臣第西偏官有閒地  
北拒晉山南望通邑雖曰人境實少浮喧廣輪裁盈數

畝布以施立黌塾薄藝桑麻創茨宇

建平王讓右將軍荊州刺史表

江淹

茂寵迺臨炫奪彞典巡恩鏡飾攪情震慮中謝臣聞該  
秩詔序匪賢莫能孚其職端維裂陝非功無或濫其選  
所以輪鞅國典締結民紐五威咸平四精式訓者也臣  
踐行迷方試業敝緒徒以綴采宗孳承渥帝席執圭戴  
筆並荷出內至乃曳組河縣蔑馴羽之化鳴環京轂謝  
擇鱗之政聲績兩無風化雙缺而龜鈕未剔璽書頻降

復改冊湘區分瑞衡服竟無賈琮交部之廉終乏郭伋  
并壤之信固以誼沓民明湫隘身諷不悟皇靈再輝河  
海重渥遂踰恒來妄責異等荆門務要方城任績水交  
沅澧山通岷峨襟帶百縣縈抱七州上德懋勛妙居斯  
地寧臣膠固所宜膺荷是以樵薄魂色驚迫心影謹刷睿  
情置露弱志伏願陛下停旒弛珎暫炤瑣曲則鑄才式  
弘練物惟遠王度既清蒙識以恭不勝慙懔屏營之情

蕭驃騎後謝被侍中慰勞表

江淹

臣某言即日侍中秘書監臣戢至奉宣詔旨慰勞便受  
轂中帷練甲外壘旂麾蔽景與徒競氣入懷秋嚴士蓄  
霜斷晦魂已掩氛監未縣稽鉞竚威寢興震慨今王人  
臨郊皇華降庭輝耀望實將激威武戴鵬之夫迎光蹠  
恩投石之師攀炤竦惠楚續越醪方茲慚潤臣忝屬聞  
私彌抱渥洽不任下情

蕭被尚書敦勸重讓表

江淹

臣公言臣五寫丹翹宜蒙凝炤一降王人遂無蠲察優

遣尚書臣伋兼侍中臣奐等奉宣慈靈重賜勉誨鏡伏  
迴環憫默失圖心魄交據淵谷匪譬臣自初被詔迄於  
今時載慚載疑以悚以厲豈非深恩鴻典永憂末躬故  
琴瑟徒鳴不傳廣樂之響燈燼空舉焉續經星之耀何  
則卓乎小者不足以任大守於蔽者不可以語通臣器  
乏淵源識暗機務倫濟夷險每憑瘖歷之遠龕折氛蜺  
輒資羣才之效臣寧有採奇鑒隱之能綱國提民之功  
乎不謂過延渥洽謬攀河漢榮宗益益寵華暉映藉聲

探議共知其幸况傳保之崇殷周特貴牧司之寄魏晉  
稱重上昭妙德次擬英勛有踰茲序渺不不紊裂今陛下  
方闢金門之聽調繡宸之政何得去禮廢雅近於臣始  
既亡前章孰表後世臣才孤位峻待罪亡日矣情哀理  
感事盡於斯伏願一運天景微見藿心則物不逃形臣  
何恨焉不勝焦憂狼狽之至

為抑世隆讓封公表

沈約

臣聞懸旌玉塞貳師尚黜其功伐鼓炎州伏波猶懼其

賞徒以兼委之施或難固辭拙心之情必無雙奪是故  
俛容青閣願還慈於裂壤竊步丹墀希收寵於開賦昔  
竄命窮雉難迫勢孤沈板未難負戶非切及顧溫清之  
館懼結尊慈之懷累葉喁喁舉門惴惴臣事逼君親理  
非外獎實賴朝暮謹肅宰略遐震奔鯨外剿臣何力焉  
幸得扶老攜幼重出幽堵還軸歸驂再踐鄉路豈可資  
國青以邀其功因衆功而饗其報遂使甘霜受電之心  
有同於飾請皎日大河之志匪殊於貌謁

讓僕射表

沈約

臣聞役壯休老上典所優晨行暮息事身恒分若夫玄  
黃未已非秋駕之衛筋力為用豈強飯之時養老杖鄉  
抑推前典服戎告謝親學匪任宿肉極其虛憊歲制防  
其不辜實所以蠲假衰疾收屏淪暮

為韋雍州致仕表

王僧孺

一旦攀附遂無涯限排雲矯漢飛捧待翼陸離蟬組照  
灼幡旗受脤推轂執珪奉酌變狹室於高門改小冠於



侯服況復還周紐其六印歸齊列其五鼎常懼輪輕載  
積基薄墉高器覆危傾人指鬼瞰老與年并疾隨衰及  
途遙齒截漏迫鐘鳴高春之景一斜不周之風忽至  
蝨疾陰條駛無幾堇薺朝采飄零已及仰朱闕而掩涕  
俯濛谷而自悲豈復式瞻拱默仰接鐘鼓儻帷蓋未親  
東岳稍駐擊壤鼓腹其賜猶多

解官表

陶弘景

臣聞堯風冲天頽陽振飲河之談漢德括地商陰峻餐

芝之氣臣棲遲早日簪帶久年仕豈留榮學非待祿恒  
思懸纓象闕孤耕壟下席月澗門橫琴雲際始奉中恩  
得遂丘壑今便滅影桂庭神交松友一出東關故鄉就  
望睠言興念臨波瀉淚臣舟棹已遙無緣躬造不任攀  
戀之誠謹奉表以聞

上昭明太子集別傳表

簡文帝

臣聞無懷有巢之前書契未作尊盧赫胥之氏墳典不  
傳若夫正少陽之位主承桃之則口實為美唯稱啟誦

自茲厥後罕或聞焉昭明太子稟仁聖之姿縱生知之  
量孝敬兼極溫恭在躬明月西流幼有文章之敏羽籥  
東序長備元良之德蘊茲三善弘此四聰非假二疎寧  
勞四皓虎賁惡其經學智囊慚其調護豈止博望延賓  
壽春能賦問疑棗據書戒憑陵而已哉玉折何追星顏  
靡續地尊號嗣外陽之術無徵位比周儲緱山之駕不  
反臣以不肖妄作明離出入銅龍仰瞻故實思所以掄  
揚盛軌宣記德音謹撰昭明太子別傳文集請備之延

閣藏諸廣內永彰茂實式表洪徽



文章辨體彙選卷一百三十二

欽定四庫全書

集部

文章辨體彙選卷一百三十五

詳校官中書臣呂光復

主事銜臣徐以坤覆勘

總校官檢討臣何思鈞

校對官中書臣高中

謄錄監生臣施華

欽定四庫全書

文章辨體彙選卷一百三十三

明 賀復徵 編

表九

勸進梁元帝表

陳 徐陵

封唐有聖還承帝嚳之家居代維賢終纂高皇之祚無  
為稱於革舄至治表於垂衣而撥亂反正非間前古至  
如金行重作源出東莞炎運猶昌枝分南頓豈得掩顯

姓於軒轅非才子於顓頊莫不因時多難俱繼神宗者  
也伏惟陛下出震等於勛華鳴謙同於旦奭握圖秉鉞  
將在御天玉璽珠衡先彰元后神祇所合非惟太室之  
祥圖謀斯歸何止堯門之瑞若夫大孝聖人之心中庸  
君子之德固以作訓生民貽風多士一日二日研覽萬  
幾允文允武包羅羣藝擬茲三大賓是四門歷試諸艱  
咸熙庶績斯無間而稱也自無妄為象鍾禍上京臬隄  
度劉宗社蕩墜嶙頭鐵額興暴皇年封豨修蛇行災中



國靈心所宅下武其興望紘極而行號瞻丹陵而殞慟  
家寃將報天賜黃鳥之旗國害宜誅神奉玄狐之錄克  
李軼於河津征陶諫於海岱滕公擁樹雄氣方嚴張繡  
交兵風神彌勇忠誠貫於日月孝義感於冰霜如雷如  
霆非貌非虎前驅效命元惡斯殲既挂膽於西州方燃  
膺於東市蚩尤三塚寧謂嚴誅王莽千剗非云明罰青  
羌赤狄同界狼豺胡服夷言咸為京觀邦畿濟濟還見  
隆平宗祀愔愔方承多福自氤氲渾沌之世驪連粟陸

之君卦起龍圖文因鳥跡雲師火帝非無戰陣之風堯  
誓湯征咸用干戈之道星躔東井時破峭潼雷震南陽  
初平尋邑未有援三靈之已墜救四海之羣飛赫赫明  
明躬行天罰如當今之盛者也於是卿雲似蓋晨映姚  
鄉甘露如珠朝垂原寢芝芳感德咸出銅池冀苑司辰  
無勞銀箭重以東漸玄菟西踰白狼高柳生風扶桑銜  
日莫不編名屬國歸貢鴻臚荒服來賓遐邇同慶其文  
昭武穆附夢也如彼天平地成功業也如此久應旁求

掌故詢詔天官斟酌繁昌經營高邑宗王啟霸非勞武  
德之候清蹕無虞何事長安之邸揚龍旂以饗帝御鳳  
宸以承天厯數在躬疇咨為讓某官等至鄴伏承聖旨  
謙冲為而不宰或云洛陽未復函谷無泥旋駕金陵方  
膺天眷愚謂大庭少昊非有定居漢祖殷宗皆無恒宅  
登封岱嶽且署明堂巡狩章陵時行司隸何必西瞻虎  
踞乃建王宮南望牛頭方稱天闕抑又聞之玄圭既錫  
蒼玉無陳乃棧撲之愆期非苞茅之不貢雲和之瑟久

廢甘泉孤竹之管無聞方澤豈不慎歟伏願陛下因百姓之心振萬邦之命豈可逡巡固讓方求石戶之農高謝為君徒引箕山之客未知上德之不德惟見聖人之不仁率土翹瞻蒼生何望昔蘇李張儀違鄉負俗尚復招三方以事趙請六國以尊秦況臣等預奉皇華親承朝命珪璋特達通聘河陽貂珥雍容尋盟漳水加牢貶館隨世汙隆瞻望鄉關誠均休戚但輕生不造命與時乖等一介之行人同三危之遠擯承間內殿事絕耿弇

之因封奏邊城私等劉琨之哭不勝區區之至謹奉表  
以聞

經通天臺奏武帝表

沈炯

臣聞橋山雖掩荆湖之竈可祠有魯既荒大庭之迹無  
泯伏惟陛下降德猗蘭纂靈豐谷漢道既登神仙可望  
射之采於海浦禮日觀而稱功橫中流於汾河指栢梁  
而高宴何其樂也豈不然與既而運屬上仙道窮晏駕  
甲帳珠簾一朝零落茂陵玉盃遂出入間陵雲故基共

原田而膺別風餘趾對陵阜而茫茫羈旅縲臣能不  
落淚昔承明既厭嚴助東歸駟馬可乘長卿西返恭聞  
故實竊有愚心黍稷非馨敢忘微福但雀臺之弔空愴  
魏君雍丘之祠未光夏后瞻仰烟霞伏增悽戀

勸進梁元帝第三表

沈炯

衆軍以今月戊子總集建康賊景烏伏獸窮頻擊頻挫  
奸竭詐盡深溝自固臣等分勒武旅百道同趨突騎短  
兵犀函鐵楯結隊千羣持戟百萬止紂七步圍項三重

轟然大潰羣凶四滅京師少長俱稱萬歲長安酒食於  
此價高九縣雲開六合清朗矧伊黔首誰不載躍伏惟  
陛下咀痛茹哀嬰憤忍酷自紩庭絳闕胡塵四起孺垣  
好時冀馬雲屯泣血臨兵嘗膽誓衆而吳楚一家方與  
七國俱反管蔡流言又以三監作亂西涼義衆阻秦塞  
而不通并州遺民跨飛狐而見絕豺狼當路非止一人  
鯨鯢不梟條馬五載英武克振怨恥並雪永尋霜露伊  
何可勝臣等輒依故實奉修杜廟使者持節分告園陵

嗣后升遐龍輅未殯承華掩曜梓宮莫測竝即隨由備  
辦禮具凶荒四海同哀六軍袒哭聖情孝友理當感慟  
日者百司岳牧仰祈宸鑒以錫珪之功既歸有道當璧  
之禮允屬聖明而優詔謙冲宵然凝邈飛龍可躋而乾  
爻在四帝閭云呌而閭闔未開謳歌載馳是用翹首所  
以越人固執熏丹穴以求君周民樂推踰岐山而事主  
漢主不即位無以貴功臣光武止蕭王豈謂紹宗廟黃  
帝迷於襄城尚訪御人之道放勳入於姑射猶使蹲俎



有歸伊此儻來豈聖人所欲帝王所應不獲已而然伏  
讀璽書尋諷制旨領懷物外未奉慈衷陛下日角龍顏  
之姿表於狗齊之日彤雲素靈之瑞基於應物之初博  
學則大哉無所與名深言則晠乎文章之觀忠為令德  
孝實動天加以英威茂略雄圖武算指麾則丹浦不戰  
顧盼則阪泉自蕩地維絕而重紐天柱傾而更植鑿河  
津於孟門百泉復啓補穹儀以五石萬物再生縱陛下  
拂袵衣而遊廣成登奔山而去東土羣臣安得仰訴兆

庶何所歸仁况郊祀配天壘篚禮曠齋宮清廟範竹不  
陳仰望鸞輿匪朝伊夕瞻言法駕載渴且饑豈可久稽  
衆議有曠桑則舊邦凱復函洛已平高奴櫟陽宮館雖  
毀濁河清渭佳氣猶存臯門有伉甘泉四敞土圭測景  
仙人承露斯蓋九州之赤縣六合之樞機博士捧圖書  
而稍還太常定禮儀其已列豈得不揚清警而赴名都  
具玉鑾而旋正寢昔東周既遷鎬京遂其不復長安一  
亂郊洛永以為居夏后以萬國朝諸侯文王以六州匡

天下方之跡基百里劒杖三尺以殘楚之地抗拒六戎  
一旅之卒剪夷三叛坦然大定御辯東歸解五牛於冀  
州秣六馬於譙郡緬求前古其可得與對揚天命無所  
讓德有理存焉敢重祈奏

賀平鄴都表

北周庾信

臣某言臣聞太山梁甫以來即有七十二代龍圖龜書  
之後又已三千餘年雖復法制樹司禮殊樂異至於文  
離武落剡木弦弧席卷天下之心包含八荒之志其揆

一矣伏惟皇帝陛下握天樞東地軸駕馭風雲驅馳龍  
虎沈雄內斷不勞謀於力牧天策勇決無待問於容成  
是以威風所振烈火之遇鴻毛旗鼓所臨衝風之卷秋  
葉竊聞伊洛戎夷幽并僭偽挹圖載籍已歸丞相之府  
銜玉繫綬並詣中軍之營百年逋誅遂窮巢窟三代敵  
怨俄然埽蕩昔周王涓水之師尚勞再駕軒轅上谷之  
戰猶須九伐未有一朝指麾獨決神武平定寓內光宅  
天下二十八宿止餘吳越一星千二百國裁漏麟洲小

水若夫咸康之年四方始定建武之代諸侯並朝不得  
同年而語矣雖復八風並唱未足頌其英聲六律俱陳  
無以歌其神武坐釣臺而誓衆似啓繼夏禹之功入商  
郊而問皋姬發成周文之志無改之道大孝也歟當今  
鹿臺已散傾宮已遣兵藏武庫馬入華山立明堂之制  
秦大武之樂盛矣哉上天降休未之有也政須東南一  
尉立於北景之南西北一侯置於交河之北然後命東  
后詔蒼冥衢壇琬碑銀繩瓊檢告厥成功差無慚德臣

忝竊榮幸蒞政東藩不獲躬到闕庭預觀大慶不勝鳬藻踴躍之至

為閩大將軍乞致仕表

庾信

臣某言臣聞禮云大夫七十致仕於朝傳家於子膳則貳珍衣稱時制臣自出身奉國四十餘年遭遇風雲從微至著太祖文皇帝扶危濟難奄有關河臣實無堪中涓從事自洛食風塵河梁旗鼓華陰有白馬之兵河曲有黃沙之陣臣雖用命不能奇策功薄賞厚因人成事

恩澤年表常以愧心仰奉周朝以揖讓登庸謳歌受命  
主貴臣遷頻煩榮寵三槐以鑄鼎象物知其神奸五等  
以桓珪飾瑞守其宮室臣以何德兼而有之况復水土  
之職王梁以應讖受徵兵戈之王韓信以登壇獨拜語  
其連類臣又何人當今四海未寧三方鼎峙陛下勞心  
之日羣公展効之秋而臣甲子既多耄年又及無參賓  
客之事謬達諸侯之班尸祿素餐久忝彝典負乘致寇  
徒煩有司加以寒暑乖違節宣失序風水交侵菁華已

竭雖復廉頗強飯馬援據鞍求欲報恩何能為役榮啟  
期之樂適足自貽燭之武之言亡能為也特乞解所居  
官言從初服事符骸骨之請非謀几杖之賜若臣北陵  
移病東臯歸老山河茅社一反司勛公侯珪璧還封典  
瑞則朝無冒位之人臣免妨賢之責虞氏養老敢希東  
序之榮周朝如荼豈望西郊之禮但瞻仰天威方違咫尺  
徘徊城闕私增悽戀不任知止之情

進象經賦表

北周庾信



臣某言臣伏讀聖製象經并觀象戲私心踴躍不勝抃  
舞伏以性與天道本絕尋求直以懸諸日月遂獲瞻仰  
九州既奠近對河圖四轍中繩全觀玉策未飛玄鶴先  
聞金石之聲不上赤城獨見烟霞之氣置管而測光景  
愈高沉玉而觀淵泉益遠寢不自涯課虛為賦詞非寥  
亮學無雕刻遂敢陳述誠為厚顏况復日之遠近本非  
童子所問天之渾蓋豈是書生所談冒用奏聞伏增流  
汗之至

齊王進蒼烏表

庾信

臣某言臣聞飛南陽之雉尚闡霸圖下建章之鵠猶調和氣況乃虞廷告瑞姬社呈祥咸高識哺之心實貴能知之性伏惟皇帝陛下德教百姓孝刑四海攝提從紀天下文明是以東海輸禽乍改黔質西山度羽或變蒼精臣去月三十日行到陝州獲大都督莫仁回樂列稱於州射堂內見一蒼烏林薄回翔循環不去駐乘木之精轉司風之翼即召儀同某甲等同時觀見斯實禮敬

所覃孝慈之感理宜歸瑞秘圖書祥帝冊用光至德取  
効升平母令赤鳳留止偏為痊玉之歌玄鶴徘徊獨擅  
銜珠之舞

文章辨體彙選卷一百三十三